

35 48.

# DEO OPTIMO MAX.

VIRGINI DEI-PARÆ, ET S. LUÆ,  
Orthodoxorum Medicorum Patrono.

## QUÆSTIO MEDICA\*,

QUOD LIBETARIIS DISPUTATIONIBUS,  
*manè discutienda in Scholis Medicorum, die Jovis primâ  
mensis Decembris, Anno Domini M. DCC. LXIII.*

M. BENJAMIN-LUDOVICO  
LUCAS DE LAUREMBERGT,  
Doctore Medico Præside.



*An in tanta multitudine medentium pauci Medici ?*

I.



EDICINA naturæ imitatio; Natura opus Dei. Ob vim rationis ab Autore inditam, etsi absque ratione tam sapienter omnia administrat cum sui juris est, ut nihil sapientius videri possit. Cum principia naturæ morbos curantis, medicinæ quoque principia sint, idem cum naturâ facere conantis, quod eam solam facere viderit, fundamenta artis non dubia existimanda sunt & nutantia, sed tam firma ut leges medicinæ naturæ ipsius leges dici possint. Nec id mirum: quam enim in operibus suis constantiam à Deo natura accepit, hanc ipsam à naturâ diligenti quantum potest imitatione medicina mutuatur. Etsi enim quod natura sola facit id perfectius faciat, quam cum arte tanquam instrumento utitur, non aliam tamen viam tenet, quæ medicinæ firmitas est & omnis securitas. Habes in natura legem Dei; habes in medicina legem naturæ; quam sequendo Medicus non errantem errare non potest, cum iisdem præsidiiis utitur quæ natura ad hominum salutem adhibere solita est. Si alia sit natura, alia quoque medicina sit: sed si una & eadem est, alius quidem remedium usum esse potest; sed alia methodus, & alia medicina esse non potest. Necessitas quæ artes parit, ad vomitum naturam impulit, quem ipsa medicinam docuit, quæ naturam imitratâ ratione & doctrinâ præscripsit, quem illa prius absque doctrinâ sed doctè præscriperat, neque viam partis ipsius naturæ repugnantem tentasset nisi antea feliciter à natura tentatam, *φλεγομελα* qua humorum æstuantium omnem impetum nullum aliud remedium citius comprimit, naturæ magis quàm artis inventum est. Non solum *αἰμορροΐα* in viris, & fluxu tam utili hæmorrhoidum, ut alia taceam, sed etiam in altero sexu *αἰμορροΐας* singulis mensibus refelluntur. Quid varices? tentamentum inane expellendi sanguinis, & conatus naturæ imperfectus nonne morbis pluribus sanandis inserviunt? Quæ tamen utiles esse non possunt, quin maximè huius remedii utilitatem probent. Si enim sanguinem loco moveri vel cum aliarum partium detrimento prodest, quanto magis si & commodiori viâ ac breviori efficacius educeretur. Quid certius quàm naturam sub noxiorum humorum mole labo-

\* Autore M. JOANNE HAMON, 1687.

A

rantem eorum exitu adjuvandam esse, cum natura idipsum faciendo, quid nobis faciendum sit, tam sæpè ostendat? Quacumque viâ id potest exonerantem se, & in sudore ac ipsius transpirationis beneficio præsidium quærentem (quæ sudorificorum & diaphoreticorum manifesta approbatio est) nonne Medici cum laude imitantur? Quid cum tam multi morbi alvi profluvio sanentur, sine quo nulla satis certa curatio est, an jure Medicus arguetur qui viam à naturâ tam tritam sequi non dubitat? cum partes principes plures ad se exonerandum vias nactæ sint, cum cerebrum præter glandularum adjacentium præsidium & commoditates oculis etiam ac auribus & ore ad excludendos humores noxios abutatur, cum patentes narium meatus non magis ad respirandum quam ad purgandum sortitum sit, hoc ipsum prudentem Medicum admonet, sanitati maximè contrariam esse *κακοχυσία*, & in morbis præcipuarum partium in quibus vitæ sens est & conservatio, sapius esse purgandum, si nihil obster, quam in aliarum partium morbis; quis aurium surditatem, & tam multa oculorum vitia, tam exiguarum partium, universa totius corporis purgatione sanari debere crederet, nisi hoc à magistrâ naturâ fieri videremus? Manifesta est urinæ non morantis utilitas, & liberius profluentis, quod cum maximis morbis sanandis inserviat, eadem hæc via ab arte, quæ à naturâ tentatus, Cum per varia exanthemata, innumeraque cutis fæditates natura expellat, quod intus, nisi expelleretur, mortem inferret, nonne ex hoc fonte hirudines, cucurbitulæ, vesicatoria, & alia hujusmodi remedia prodierunt? Quid cum morbos in remedia convertit, & ulceribus quæ sanari non potuerunt, ad salutem totius corporis abutitur, nonne cauteriorum utilitatem docuisse existimanda est, quæ constanti & non intermisso auxilio præcipuarum partium infirmitatem sublevent, quod semper affluit, semper exhauriendo: sed ne injuriâ & iniquitate calumniantium ars nobilissima violari posset gravissimum testimonium sumit à naturâ, cui adjutrix à Deo data est, & cui tam firmo nexu inhæret, ut ab eâ separari non possit; testimonium sumit à mirabili scientiâ prædicendi, quæ morborum eventus in futuri temporis obscuritate adhuc latentes, tanquam cernerentur oculis, clarè annuntiat; testimonium à Medicis qui vim illius magis perfectam habent, & illam certius in tot hominibus, quos ab ipsis mortis faucibus eripit, experiuntur; testimonium ab Agyptiis & imperitis, qui errando tacitè alios admonere possunt ne similiter errent, & ipsâ erroris calamitate viam ostendunt quæ sequenda erat à quâ imperitè recedentes ita lapsi sunt ut in artem peccando, veritatem tamen ipsius artis vel inviti commendare videantur; testimonium à morbis, tanquam ab argumento peritiæ & potestatis suæ; testimonium ab ægris, sive qui ab eâ salutare auxilium non frustra petierunt, sive ab eis qui non petiere & quibus defuit; testimonium ab inimicis qui periculosi contemptus non ratò pœnas luunt; testimonium denique ab intemperantiâ perpetuâ illius inimicâ, quæ tam multos occidit, quos sanctis & necessariis sobrietatis suæ legibus servare potuisset.

## I I.

**S**IC omnem artem mutis quibusdam naturæ institutis & legibus constitutam & sexcultam habemus, quarum si ratio habeatur nihil certius istis medicinæ velut fundamentis de quibus non magis, quàm de clarissimarum scientiarum principis dubitandum cum non opinione sed naturâ consent. Sed cum ab hac luce universalium principiorum, ad unumquemque sanandum descendimus, in magnâ sæpè obscuritate versamur, & tenebris tam densis circumfundimur ut opinio nostra conjecturâ magis quàm ratione fulciatur. Interdum Dogmatici nequidem Empirici sunt, cum nec ratio obscuris, nec experientia inusitatis affulgeat: tunc Medici prudentia non festinantis, cum veritate aperta non possit, verisimilibus tantum conjecturis innititur, & naturæ non adjuvantis silentium quoddam majori diligentia, & soler-

tiori curâ emendare conatur; tunc ex præteritorum recordatione quærit subsidium; & similitudines consecratur profuturas, à quibus, cum à naturâ non possit, apti tandem & utilis remedii indicationem mutuatur. Ita nec in his raris medicina deficit, quin aliquod auxilium ægris suppeditet, & sæpè cogitandi & meditandi patientia lucem quandam affert rebus obscuris, ita ut aptum remedium, quod inveniri non posse existimabatur, investigandi pertinacia inveniatur. Si sui juris est natura, & ipsa curanti Medico præire cernitur, prudenti Medico facilia sunt omnia, præsertim si exercitatio non desit: usus enim ratione & experientiâ comparatus optimus medendi magister est: sed nec incipientibus desperandum est, quibus si nec ingenium, nec scientia desit, quod exercitati statim pervidere possunt, id quoque ipsi sæpius & diligentius rem secum versando assequuntur. Si verò parum abest quin natura vincatur & hosti cedat potentiori, si vires ita opprimantur ut extrinsecus videri possint, diuturnâ cogitatione & velut fixâ in naturâ & morbo agrotantis viam inveniet quæ impedimenta naturæ, vim illi inferentia, quibus velut catenis quibusdam victa tenebatur, removeat, ut jam libera medicum adjuvet adjuvantem, donec utraq; vi, naturæ & artis morbus expellatur. Sed quod mirum est nec morbis insanabilibus deest medicina. Cum morti cedere cogitur, quæ universâ medicinâ potentior est & uni Deo cedit, facit certe ut lenius ægri moriantur, dolores, qui acerbissimi mortis satellites aut potius torrores dici possunt sæpè mitigat, lenit vigilias, remedia adhibet non nocitura, quæ etsi ægritudine inferiora ægrum saltem consolentur & parte quadam molestiarum levant. Adde quod vitam, quam tueri non possunt, interdum longiorem efficiunt, ut ex iniquo certamine hoc saltem commodi reportetur quod nihil omiserint quod fieri posset, & nihil fecerint (dummodo arti eos deesse non contigerit) si postea accusentur quod non sapientem habeant excusationem, præsertim si modestius agant, ne quod necessitati naturæ mortalis tribui debet medicamentis periculosioribus tribuatur. Omnibus ergo medicina salutaris, sanos à morbis arceat, vim addit infirmis, morbos curat quicumque curari possunt, insanabilium furorem lenit & faciliorem exitum præstat morituris. Unde merito ars artium dici potest, omnes aliæ homini aut habitationem, aut vestes aut alimenta tribuunt, divitias aliæ suppeditant, in aliis dignitas quæritur aut quædam voluptas, & variarum subtilitatum inania oblectamenta, quibusdam hominum perniciës comparatur, & quædam ars occidendi, sola medicina majus bonum & nobilius conservat, idque præstat quod aliæ omnes præstare non possunt. Efficiunt quidem ut homines commodius aut illustrius vivant, medicina ut vivant: & cum sit vitâ nihil homini optabilius cujus conservandâ causâ facile omnia relinquuntur, adeo ut miseram vitam morti etiam anteponan, sequitur inter omnes artes & scientias nobilissimum quemdam locum medicinam obtinere, præsertim cum de nullâ aliâ tam clarè pronuntietur quod eam Deus creaverit. Uno verbo dici potest, quantum ad privatam ususque hominis utilitatem spectat, nulla arte inferiorem esse medicinam, sed si orbium & Provinciarum ratio habeatur, nobilissimas artes regendorum populorum, vincendorum patriæ hostium & administrandæ justitiæ, quæ solâ pax regnorum continetur medicinâ esse anteponendas, ita ut tamen fatendum sit hos ipsos salutis publicæ defensores præstantissimæ artis defensione & cura indigere.

## I I I.

QUOT verò dotibus & quo virtutum apparatu instructum esse necesse sit, qui tantæ artis dignitatem sustinere velit vix dici potest quam perspicaci ingenio esse, & quam necessaria illa Galeni *ἀγρυπία* scrutandi latebras naturæ & utam viam investiganti per loca aspera, & prærupta, in quibus nulla via cernitur, quo judicio & prudentia instructus esse debet ut non abducatur à verisimilibus conjecturis nec ratione fallatur, qua sæpè nihil aptius ad fallendum. Ut enim cum faciem præfert in-

ter præcipitia ambulanti tam necessariam, multum prodest; ita qui se illi nimis credunt cum solitaria est, facile in errorem impelluntur. Quanta illi diligentia opus est ut adsit omnibus naturæ momentis, nec tempus breve prætervolantium occasionum inutile elabi sinat? Quantam patientiam exigit ministrorum & astantium *ἀλογία* varique errores agrorum, quos facile morbus reddit impatientes, qui non perversa assentatione, sed mansuetudine & patientia leniendi sunt? Errant certe qui solum in Medico requirunt scientiam, nec de patientiâ cogitant quæ prudentiæ maxima pars est. Scientia quam magna, & quam multarum rerum desideratur, quæ omnia elementa pervadat, & quidquid continetur universo terræ ambitu comprehendat. Quocumque nos vertamus remediis cingimur, sed latentibus quæ diligentius erui deberent quam aurum ex terræ visceribus, minus certe profuturum. Ut subtilior & inutilis astrorum cognitio minus in Medico desideretur, eorum tamen exortum & multorum effectus non ignotos, quibus corpora varie afficiuntur, ab eo penitus ignorari turpe esset. Quanto studio res tam diversæ complectendæ sunt? Si desit laboris tolerantia, nemo altius assurger, sed longe infra nobilissimæ artis maiestatem semper jacebit. Nulla fere pars medicinæ est quæ totum hominem non exigit; multis vita non sufficit, qui se vel partium corporis, vel remediorum scientiæ addixerunt, & adhuc multa superesse fatebuntur quæ non satis cognoscantur. Nulla quidem pars artis negligenda, cum nullum rerum genus avulsim à cæteris per se ipsum constare possit. Meminerimus tamen non ita hærendum esse in parte ut totius obliviscamur, non enim ab unaquaque parte seorsum cognominamur, sed ab universa arte Medici dicimur, iis magis intenti disciplinis quæ magis ad sanandum necessariae sint, cætera aut prætermittendæ, aut certe in iis non immorandum. Vix crediderim antiquis musicam Medico necessariam asserentibus. Qui urgentur necessariis, quibus pares vix esse possunt, an onerandi superfluis, quæ & tempus breve infumunt, & mentem avocant, quâ totâ in re tam magnâ opus est, ut censet, Aristoteles non desiderari in Geometra cognitionem alterius disciplinæ, ex qua peritior Geometra esse non possit; ita nec in medicinâ studium hominum salutis necessarium in res minus necessariae partiendum: nec nimis rudem in philosophia esse oportet, nec nimis subtilem, cum subtilitate nimîa sæpe aberreretur, quæ longius immorantem abducit. Rarò subtilior Philosophus qui totus est in argumentando, bonus Medicus evadet. Ad sanandum vocamur, non ad argumentandum: quod etsi Medico instituendo necessarium esse possit in istis infantie adjunctis, & velut crepundiis, non diu immorandum. Quamquam barbarum esse Medicum & prorsus elinguem incommodum sit, fatendum tamen nil minus Medico necessarium esse quam eloquentiam. Oratori quidem studium dicendi nisi accedat, os nullum esse potest, medicina vero etiam in muto mirabilis esse posset. Socrates dicere solebat omnes in eo quod scirent satis esse eloquentes: certe non requirimus Medicum eloquentem, sed sanantem. Sed quod maxime necessarium, amet Medicus Ægros, qui se illius fidei commiserunt, non tantum quod amore acuitur ingenium ad investigandum quod ægro sit utilius, & ad maiorem curam & diligentiam incitatur, sed quod id multum valet ad conciliandam sibi ægrotantis benevolentiam ægrotanti tam necessariam ad provocandam obedientiam, ad devorandas ægritudinis & remediorum molestias. Curet ergo Medicus ut ametur, non tam ut ametur, quam ut sanet; in quo ægrotantis utilitati consulit non suæ, quod verum sit nihil aptius esse ad sanandum quam diligi, si cætera non desint: nil magis cavendum quam ne contemnatur. Neque enim expectanda est obedientia contemnentis nec sanitas non obedientis. Nihil ergo in Medico sit quod animum Ægri offendant. Hippocrates & Galenus in eo tam religiosi fuerunt, ut vel incesus & vestium curam habuerint nec ungues ipsos & capillorum modum tanta diligentia præterierint, Levîa hæc per se



sed non leve est, nihil in Medico reprehendi posse. Maximi vero momenti res est, quod Medicorum Princeps scripsit, *Medicum ab omni mercatura & externis negotiis alienum esse oportere*, ne à pulcherrimo opere curis alienis avocetur; *non curiosum* ne tempus salvandis hominibus debitum in foro & rebus certe superfluis & nihil agro profuturis insumatur; *non loquacem*, sed potius taciturnum, quod fluxus verborum etiam mentis aciem obtundentium necessariam in tantis rebus meditationem impediatur; *non avarum* ne pecuniæ amore totum ad se hominem rapiente à studio & ab utilitatibus ægri avocari possit, quibus nihil debet anteponere; *non in risum effusum*, nam hoc, præterquam quod levitatem significat, in Medico vitæ & mortis naturali iudice non ferendam, defectum quemdam humanitatis ostendit: turpe est enim & inhumanum eum qui in calamitate generis humani, cujus magnam partem morbi faciunt, semper versetur, tam parum affici aliorum dolore ut etiam immodestius rideat, quod neque ægris, neque amicis ægrotorum placere potest. Nos mitum vero si postea idem Hippocrates in Medico requirat *judicium*, ut verisimiles & decipientes conjecturas, à verarum indicationum luce distinguat; *quietem*, ne de tantis rebus & vitæ hominis deliberanti, curæ inanes, & tumultuantium passionum strepitus obstare & officere possint; *scientiam*, ne fallatur; *virtutem*, ne passus; *gravitatem*, ne contemnatur; *authoritatem* vitæ & morum laude comparandam, cui facilius obediatur; *pudorem*, qui ipsa probitatis commendatione placet omnibus & semper prodest. *Medicorum ludicros sermones esse non oportet*; *de alienis rebus ab arte raro loquantur*; & si quandoque id convenire videatur, non prius quam de necessariis & seriis morbis satisfecerint. Quid enim æquius, quam ut ægris de ægritudine loquantur, & inde sermonis argumentum sumant, quod necessarium sit & illis magis placeat. Meminerint non decere ut quidquid de morbo cogitaverint id passim in obvios quosque effundant. Sed quid magis Medico religione & pietate necessarium, quæ ipsorum etiam Ethnicorum testimonio medicinæ tam insita est, ut ab ipsa arte doceri videatur. Errat vero Arætus qui graviores morbos ope tantum divinâ curari posse existimat. Deus, quo curante nemo moritur, & quo non cutante, nemo vivit, in magnis, & in levibus morbis regnat; nec propterea medicinæ auxilium excluditur. Quod sanat homo, sanat Deus, quo quidem nihil Medicis gloriosius esse potest, qui in tanti operis societatem veniant, & simul cum Deo medente medeantur.

## I V.

UT hæc omnia habeantur, ad medicinam natum esse oportet. Nisi natura in futuro Medico prima artis fundamenta jecerit, si apta indole & ingenio careat, non magis illi medicinæ præcepta proderunt, quam si de agrorum cultu scriberetur sterilibus terris: nec vero innata illa velut semina multum prodesse, nisi omni studio ac diligentia & optimis disciplinis excolerentur ad comparandam medicinæ scientiam, quæ usu ipso postea & exercitatione perficitur. Sola ratio aut sola experientia non sufficit. Nemo uno pede incedit, quin si unus superet alterum turpis elaudicatio est: non minus utroque experientiæ & rationis pede universa medicina innititur. Titubantem sæpe rationem & non satis certam sustentent experientia, & experientiam minus oculatam lux rationis dirigat, ut absit errandi periculum quod sola experientia cavere non potest. Incipientem sapius dubitare & omnia timere prudentiæ est, donec exercitatio contingat & quædam ex artis fiducia securitas. Medicorum congressus utilis & maxime prodest penitus se immergere in consuetudinem periti Medici, qui nutantem in artis operibus confirmet, & velut manu ducat ad scientiam sanitatis. Qualem & quantum consequentes ætates Hippocratem admiratæ sunt, talem illum *opera artis* teste Galeno reddiderunt. Experientia optima magistra est. Nec vero experientiam nominaverim usum medendi imperitum, ex quo non major medendi scientia, sed major temeritas & periculosa audacia acqui-

ritur. Medicorum libri peritis utiliores quam imperitis, Medicos non constituunt, sed multum adjuvant si natura non desit. Utinam quod quisque esset expertus id tantum scripsisset ommissis aliis quæ aliunde repeti possunt; ditior esset medicina & brevior ad illam via sterneretur, facilius est Medicum aliquid ab imperito discere, quam à Medico imperitum cui iubetur *επαυξας ιδιωτης ιατρειν*. Aliorum certe Medicorum consilium non repudiabit. Non minus forte errabit qui omnibus credit, quam qui nemini. In vitâ tam brevi tantam mercedi scientiam assequi potest, ut aliorum inventis & experientiâ non indigeat, quæ si destituatur sibi solus non sufficit. Antiquis maxime fidendum. In Anatomicis recentiores magis exercitati. Quod Hippocratem & Galenum natura docuit, id nos ipsi docuerunt, duo illa medicinæ lumina sibi consentientia tuto Medicus sequetur. Nec aspernanda clarorum in arte Medicorum sententia, dummodo meminerimus nullam adversus salutem ægrotantis auctoritatem valere posse. Mirum reperiri qui in tanta rerum ignorantia afferant nullas esse vires occultas. Talis scientia hominum omnia se scire opinantium ignorantia pejor. Naturâ non adjuvante omnis curatio inutilis, nec accusari debent qui medentur cum rerum vitia sint, non Medicorum. Ubi nihil naturæ est, nihil ab arte expectandum: aliquando tam valida est ut non solum morbi vim, sed etiam errorem superet adjuvare se glorianrium, & sola plus possit ad salutem quam medentis imperitia ad exitium: artificis igitur scientiam semper ab exitu metiri non oportet, cum aliquando convalescant, qui male curati sunt, solius naturæ beneficio, & moriantur, quibus ars non defuit deficiente natura. Sed homines ad calumniandum proni illarum gentium consuetudinem non imitantur, apud quas sollempne est Imperatorem bello victum non minus laudare quam si vicisset, cum nihil omiserit ut vinceret. Sed eo Medicus innocentior quod medicinam sapere oporteat finem suum non assequi in hominibus, ipsa naturæ necessitate morituris. Nil magis prodest quam summa periti Medici & ægri obedientis consensio; quæ si deest, nihil periculosus. Cum enim ægrum & Medicum junctis viribus adversus morbum pugnare oporteat, actum est de vita ægrotantis qui morbo faver, mortem inferenti, & Medico sanantem conant resistit, cui obedire salus est obedientis. Sed ut ægrum obsequentem habeat in necessariis, in iis quæ multum nocere non possunt, illi interdum obsequatur. Nec reprehendi debet Medicus qui paulum se inflectit erigendi industriâ. Nimia severitas inobedientiæ proxima. Cum ægro omnia negat Medicus, timendum est ne Medico omnia neget ægrotus, sed cum aliquid conceditur sola ægri non vero Medici utilitas spectanda est. Deum novit medicina, sed fortunam ignorat. Felicior in curando qui peritior est, qui maiorem ad sanandum diligentiam adhibet, & propriæ opinionis non nimis tenax. Non parum laudandum est qui meliorem aliorum sententiam suæ præferat, qui minus bene sentientem amice moneat, aut si etiam opus sit refellat sine acerbitate, & ipse refelli paratus sit sine iracundia. Non pudeat mutare sententiam, cum id ægro utile futurum est. Quis tanta de re quin varie secum disputer, Quando de vita hominis agitur diu deliberandum est & in perplexis occurrentium symptomatum difficultatibus diu cogitatione immorandum, ut utilis sententia, quæ forte properantem præteriret, eliciatur.

## V.

UT ingenii acumine & iudicio opus est ad dijudicandas morborum causas quæ occultæ sunt, & discernenda verisimilia tam sæpe fallentia à securitate veritatis: non minus illud requiritur ut ex tanta abundantia remediorum, in quibus multa inutilia & quædam etiam noxia reperiuntur, quæ congruentiora erunt & naturæ & morbo ægrotantis, eligantur. Medicus remediis non careat quæ sanandi sunt instrumenta, quod turpe esset. Sed adhuc turpius si remedia Medico carere contingeret. Non sola cognitione remediorum Medicus constituitur, sed magis utendi peritiâ

ut enim maximam copiam noverit, plura opinor & commodiori ordine in Phar-  
 macopœorum officinis distribuuntur, quæ tam longe absunt ab arte. Tutiora remedia  
 quæ non secreta. Cum enim sapius & à pluribus usurpentur & natura remedii, &  
 utendi ratio magis cognoscitur. Remedia admirabili quadam vi prædita diu occul-  
 tari non possunt: quæ in lucem non erumpunt infirma crediderim. Interdum im-  
 becillitatis conscientia absconduntur. Accedit quod homines magis admirentur quod  
 ignorant. Sed nihil ignorantie judicio corruptius. Nec Medicus ægrum remediorum  
 multitudinæ obruat, nec etiam destituat paucitate. Nullum remedium nimis amet,  
 & nullum quod prodesse possit avertetur. Dubia, & quæ satis comperta non habet,  
 Galeni exemplum secutus prudenter omittat, & tanquam dubia prædicet; quæ vero  
 optima expertus sit, libenter alios doceat. Aliud quam artem & ægros amare con-  
 vincitur qui utile aliis remedium omnes celat. Optima laudet, famam detraha-  
 nocentibus aut vi quam illis homines falsa opinione decepti tribuere solent carentibus.  
 Sapiientis Medici gravitate & constantia indignum est, aut falsum sentire, aut,  
 quod non satis explore perceptum sit sine ulla dubitatione defendere, urinam falsa  
 præsidia pro falsis, vera pro veris, & dubia pro dubiis haberemus? Sed cum homines  
 inventa à se remedia aut à se usurpata solita cæco quodam affectu nimium ament,  
 falsa laudes veram & naturalem remediorum vim occultarunt. Periculo non vacat  
 si effectus remediorum rari pro usitatis aut usitati pro raris habeantur. Nec calorem  
 semper aut frigus criminari oportet tanquam causas morborum. Calidiora remedia  
 efficacius interdum igneam calorem temperant quam frigidiora. Vinum in quo spes-  
 vita *ἐν τῷ* & *ζωτὴν* medicamentum utilissimum quamvis multis venenum sit. Nullum  
 tam præclarum remedium quod prosit semper, nullum tam anceps aut infirmum quod  
 aliquando non prosit. Hæc omnia sita sunt in prudentia utentium & naturæ viribus  
 quibus destituro quod vis remedium inutile. Antiquorum scientiæ sed non remediis  
 cedimus. Vereor tamen ne in *ἐλλειψίῳ* superemur. Consuetudinis ratio non habenda  
 est in præscribendis remediis, quæ sola præscribere debet necessitas aut utilitas  
 ægotantis. Non magis usurpanda esset venæ sectio si omnibus placeret, nec minus  
 si omnes averfarentur, ne sit ista medicina temporum, non naturæ quæ medicinæ  
 origo est. Qui vulgi opinioni favet, quod illi forsitan resistere non audeat, pessimum  
 Magistrum sequitur, qui decipitur facile ob ignorantiam, & facile decipit, ob  
 quamdam autoritatis imaginem, quam in eos exercet, qui aliquid præferunt veritati.  
 Quid præscribat Medicus, aut non præscribat, scientiæ res est, non voluntatis;  
 non liberum est quod illi primum in mentem venerit, imperare. Non minus natu-  
 ram consulere debet Medicus, quam æger Medicum. Habet uterque quem sequatur,  
 à cuius ductu si discedat, errandum est. Tutor ægrorum & sanitatis id tantum po-  
 test quod illis utile sit, non autoritate dominantis, sed consulenti modestiæ. Non sem-  
 per Medico faciendum quod aliquando natura fecerit, sed tunc solum, cum id ipsa  
 faceret, si non impediretur. Qui naturæ nutum ad viam suam propendentis accura-  
 tius observat, acutius perspicit, & diligentius sequitur, peritior Medicus censi  
 debet: illam si non audiat tacita quadam voce veram methodum indicantem, irritus  
 naturæ conatus bene consulenti, culpa est Medici male obsequenti, nec amplius  
 naturæ Discipulus & Minister dicendus est, sed adversarius & proditor. Non errabit  
 qui universæ artis vim omnem magno quodam compendio duobus verbis complec-  
 tetur *ἢ πάντων*. In scientia propemodum infinita quadam ignorari possunt non sem-  
 per necessaria, sed rem tam necessariam ignorari, cederet in medentis ignomi-  
 niam, & periculum ægotantis. Medici error medicinæ tribui non debet quæ sem-  
 per magna est, etiam cum ministri non magni sunt, sive servata legum suarum  
 constantia opponat se intemperantiæ perire volentium, seu demittat se ad infirmi-  
 tatem ægotantium, non adulantis, sed sanantis affectu, seu remediis multis, seu

paucis utatur five validiora adhibeat seu leviora, eadem est nec mutatur in iis quæ sapienter mutat. Vera & unica illius lex, ad quam omnia refert, salus agrotantium; certiora remedia suadet venena damnat, & tam sapienter se gerit ut cum illis utitur remedia sint, quidquid in rerum natura cognoscitur, usurpat ad salutem, quod nondum cognosci potuit, prudenter investigat. Cum novi morbi à Deo immituntur, ipsa Dei iustitiâ populos puniente utitur ad profectum suum, & inde fit doctior. Nullum fere sæculum est in quo novorum præsidiorum inventionem non locupletetur, nihil illi deest præter ministris, quos non assumit, sed patitur. Agyptæ, servi, mulieres, omne hominum genus illam invadunt. Cuilibet se professo Medicum statim creditur, & cum se tam difficiles Medicis exhibeant, facillimos se præbent, non Medicis, imperitis, & fallentibus, quibus nudum latus offerunt ultro ad feriendum. Sed isti officium medicorum ita usurpant, ut nec Medici nominentur, & hoc illis prodest interdum non esse Medicis, ut à stultis facilius audiantur. Quot vero ex Medicis ipsis, nec ingenio, nec scientiâ, nec prudentiâ, nec laboris tolerantia tam necessarij ad comparandam scientiam commendabiles. Quamvis alia non deessent quoruscunque est qui inerti otio non delectetur. Quidam vel in minimis rebus pertinaces & vincendi studio tam importuni suat, ut à nemine sustineri possent: aliqui facile de sententiâ dimoventur, etiam verâ, & nimium flexibiles sequuntur quocumque alius ducere voluerit; alij sapientiorum consilio sapere non possunt utendi inscitiâ. Invenire est qui se solos Medicos periculoso errore existimant, ostentantes se admiratione sui solitariâ, quæ aliorum omni admiratione destituitur, contemnentes & contempti; quidam in superiores & fama celebres invidi & contumaces, in æquos & pares iniqui, in inferiores fastidiosi, nec sibi sufficere possunt ob imperitiâ nec ab alijs adjuvari ob superbiam. Quot ex illis naturæ fictis adjutoribus qui nec naturam noverint, nec remedia quibus adjuvetur, qui officia Medici ignorant, & ea implere non possint quamvis non ignorent. Utinam minus bene concluderetur.

*Ergo in tanta multitudine medentium pauci Medici!*

DOMINI DOCTORES DISPUTATURI.

*M. Josephus Duffans.*

*M. Franciscus - Ludovicus - Thomas Dongle, Chirurgiæ Gallico idiomate Professor designatus.*

*M. Petrus Lalouette.*

*M. Joannes - Armandus Roussin de Montabourg.*

*M. Guillelmus Fumée.*

*M. Petrus - Josephus Macquer, Regiæ Scientiarum Academiæ Socius & Censor Regius.*

*M. Natalis - Nicolaus Mallet.*

*M. Marinus - Jacobus - Claudius Robert.*

*M. Josephus - Maria - Franciscus Laffone, Regis in Sacro Consistorio Consiliarius, Regiæ Medicus Primarius, Censor Regius & Regiæ Scientiarum Academiæ Socius.*

Proponebat Parisiis JOANNES - BAPTISTA - ALEXANDER MAIGRET, Parisinus, saluberrimæ Facultatis Medicinæ Parisiensis Baccalaureus. A. R. S. H. 1763. A SEXTA AD MERIDIEM.

Typis Viduæ GUILLAU, Universitatis & Facultatis Medicinæ Typographi, 1763.